


SC

Skina di
CLYDE

Un Servicio Nobo pa 2016. Gratis

Skirbi pa: Clyde Harms

SC Algun biaha un persona ta bisa mi cu el a hera un articulo di mi pa un razon of otro; p.e. net e dia ey e no a cumpra corant of e tabata den exterior, etc. Naturalmente si e bay Biblioteca Nacional of e subi internet, e por haya cualkier corant. Den casonan asina ami ta manda e articulo pe na su adres electronico, manera m'a mand'e pa prensa.



Mi por imagina mi cu esaki ta pasa hopi biaha cu hopi hende sin cu ami sa di nan. Pesey mi kier cuminsa un servicio di subscription completamente gratis.

Si bo skirbi mi na mi adres electronico **clydeharms@yahoo.com** y bisami cu bo kier subscribi na e servicio, abo lo haya e articulonnan den bo propio inbox, manera cu mi ta manda nan pa prensa y na mes momento. Gratuitamente!! Asina bo no ta perde ningun articulo di mi.

Mi no ta grita "I AM THE GREATEST", manera Muhamed Ali, pero modestia aparte, mi ta kere cu mi articulonnan ta balapena. Mi lesadornan ta bisami cu nan ta educa y inspira, nan ta entretene. Algun bes nan ta critica, pero nunca nan ta insulta. Cu orguyo mi por menciona cu articulonnan di mi a wordo publica den revista di Aruba Huis na Hulanda,

den revista di Costa Linda Resorts, y adapta y traduci na Hulandes pa Amigoe. Un articulo te hasta a wordo uza un aña pa un examen na Colegio Arubano. Ami sa di varios di e articulonnan cu a wordo poni den leishi y ta colga den cas y organizacionnan priva y den lugarnan publico.

Durante e aña cu ta cabando, m'a skirbi un averahe di un articulo pa siman, tur riba diferente topico. Mi a skirbi di historia y di actualidad. M'a skirbi na Papiamentu y na Ingles. Mi a skirbi di baluartenan di baseball Arubiano na reapertura di Joe Laveist Sportpark y mi a skirbi di e campeon Curazoleño di tennis dobel na Wimbledon. Mi a skirbi di e buniteza di beachnan di Aruba y di e tristeza na beachnan di Bodrum y Buna. M'a skirbi di mi operacion y recuperacion di un bypass coronario na Aruba y m'a skirbi di e celebracion di mi prome cumpleaños despues na un pueblo chikito den serunan di Boyaca, Colombia. Mi a skirbi di e encuentro cu un nieta di e exdirector di DOW y di e encuentro cu un amigo di mi tempo di Libia. Mi a publica mas di 50 articulo durante 2015 y pa 2016 mi tin intencion di publica por lo menos mes tanto.

Mi articulonnan ta sali den corantnan imprimi **Diario**, **Aruba Today** y **Solo di Pueblo** aki na Aruba; **Extra** y **Ultimo Noticia** di Corsow y **Extra Boneriano** tambe ta publica algun. Corantnan digital **AweMainta** di Toko y **Mas Noticia** ta publica mi articulonnan.

Cuminsando 2016 mi articulonnan lo ta acompaña pa un logo nobo, un caricatura di tempo mi tabata core bais rond Aruba cu algun amigo tur diadomingo. Si bo ta un lesado regular di mi articulonnan, of si ta de bes en cuando bo ta lesa nan, lo bo aprecia e servicio gratis di ricibi nan den bo inbox. Contacta mi na **clydeharms@yahoo.com**.

Bendishon di aña nobo! Happy New Year! Sretna Nova Godina!
Gelukkig Nieuw Jaar! ¡Feliz Año Nuevo!

Por contact Clyde Harms via
clydeharms@yahoo.com